

TEKS UCAPAN
BRIG. JEN. DATO' PROF. DR. KAMARUDIN HUSSIN
NAIB CANSOLOR
UNIVERSITI MALAYSIA PERLIS
SEMPENA FORUM KEHARMONIAN ANTARA AGAMA
PADA 25 FEBRUARI 2013
DI KOMPLEKS DEWAN KULIAH , KAMPUS PAUH PUTRA

Assalamualaikum Warahmatullahi Wabarakatuh, Salam Satu Malaysia dan Salam Sedekad Gemilang, UniMAP di Hati

SALUTASI

Yang Berbahagia Prof. Dr. Zul Azhar Zahid Jamal, Timbalan Naib Canselor (Akademik dan Antarabangsa) UniMAP

Yang Berbahagia Prof. Dr. Ismail Daut, Timbalan Naib Canselor (Penyelidikan dan Inovasi) UniMAP

Yang Berusaha Encik Zuber Bin Haji Mohamad, Timbalan Pendaftar UniMAP,

Yang Berusaha Puan Saodah Hassan, Bendahari UniMAP,

Yang Berusaha Puan Mazmin Mat Akhir, Pustakawan Kanan UniMAP,

Yang Berusaha Penolong-Penolong Naib Canselor UniMAP,

Yang Dihormati Barisan Ahli Panel Forum Keharmonian Antara Agama

Dekan-dekan dan Ketua-ketua Jabatan, Seterusnya warga kerja Universiti Malaysia Perlis yang saya kasihi sekalian.

Kata Aluan

Alhamdulillah, setinggi-tinggi puji dan syukur ke hadrat Allah s.w.t. kerana dengan limpah kurnia serta izinNya dapat saya bersama-sama dalam majlis yang amat bermakna ini. Saya merasa amat berbesar hati dan merakamkan setinggi penghargaan dan terima kasih kepada semua yang terlibat dalam menjayakan program ini. Saya berpandangan program seperti ini merupakan aktiviti penting supaya erti keharmonian dan keamanan dapat dihayati dan difahami dengan lebih mendalam terutamanya generasi muda ketika ini.

Hadirin dan hadirat sekalian,

Perpaduan

1. Seperti yang kita sedia maklum, UniMAP merupakan juara perpaduan dan selaras dengan itu, Canselor UniMAP, DYTMM Tuanku Syed Faizuddin Putra Ibnu Tuanku Syed Sirajuddin Jamalullail telah berhasrat agar UniMAP menganjurkan Forum Keharmonian Antara Agama bagi memberi kesedaran kepada masyarakat khususnya warga UniMAP akan kepentingan menjaga keharmonian antara agama sesama kita.
2. Perpaduan antara agama yang kita amalkan kini memberikan impak besar kepada keharmonian negara yang kita kecapi selama ini. Dengan kedamaian ini negara dapat menjana kekuatan lebih besar pada depan apabila rakyat tidak melihat kelainan dan perbezaan antara satu sama lain.
3. Saya melihat penganjuran forum ini adalah langkah awal bagi memberi kesedaran khususnya kepada warga pendidik, ibu bapa dan pelajar agar mengutamakan kepentingan untuk tidak menyentuh dan menghormati sensitiviti kaum lain.

4. Sebagai rakyat Malaysia , kita haruslah menghormati kelainan kita, menerimanya sebagai suatu warisan yang kita hargai yang mungkin tidak banyak terdapat di negara lain seperti Malaysia. Ada negara yang mempunyai satu agama tetapi mempunyai pelbagai puak, bergaduh dan berperang sesama sendiri, kita tidak mahu perkara seperti ini terjadi di negara kita.

Hadirin dan hadirat sekalian,

Minggu Keharmonian Antara Agama Sedunia

5. Cetusan idea Yang Mulia Raja Abdullah Ke-2 dari Jordan untuk mengadakan Minggu Keharmonian Antara Agama Sedunia adalah merupakan satu usaha ke arah keamanan sejagat. Cadangan ini telah mendapat sokongan dan pengiktirafan pelbagai pihak, sehingga Minggu pertama setiap bulan Februari telah diisytiharkan sebagai Minggu Keharmonian Antara Agama Sedunia di Persidangan Bangsa-bangsa Bersatu pada 20 Oktober 2010.

6. Cadangan yang dibentangkan oleh Yang Mulia Raja Mahkota Ghazi Bin Muhammad sebagai wakil dan penasihat khas kepada Yang Mulia Raja Abdullah Ke-2 tersebut, bukan sahaja diterima dan disokong oleh penganut Islam dan Kristian yang merupakan 55% penduduk dunia, tetapi semua penganut agama lain di seluruh dunia. Berikutan dari itu, negara-negara di seluruh dunia telah diminta untuk menyambut dan mengisi Minggu Keharmonian ini dengan pelbagai aktiviti bersesuaian yang bertujuan untuk mempromosi persefahaman antara agama. Walaupun ianya baru diperkenalkan, penyertaan dan sambutan yang diadakan dalam Minggu Keharmonian Antara Agama pada Februari tahun 2011 telah menunjukkan kejayaan yang amat membanggakan.

7. Di dalam sejarah ketamadunan manusia, kebiadaban terhadap Tuhan dan Jiran telah mencetuskan pergolakan dan peperangan di antara penganut-

penganut agama samada secara inter atau intra, mikro atau makro. Lihatlah apa yang telah dialami oleh negara-negara Timur Tengah, Afrika, Russia malah negara-negara jiran tetangga kita juga. Oleh itu, kita seharusnya bermuhasabah dan berikhtiar mencegah peristiwa buruk dan ngeri agar tidak berlaku di negara kita yang tercinta ini

Hadirin dan hadirat sekalian,

Prinsip Keharmonian Antara Agama

8. Mengikut saranan Prof. Dr. Kamar Oniah dari UIAM di dalam bukunya Religion and Pluralistic CoExistence - the Muhibah Perspective, telah menggariskan lima (5) prinsip utama untuk memastikan keharmonian antara agama dan kaum dapat dikekalkan. Ini termasuklah :-

- a) Tidak mengganggu dan campur tangan di dalam hal-hal dalaman agama orang dan kaum lain.
- b) Mengakui, memahami dan menghormati kelainan atau perbezaan dan rasa sensitif agama dan kaum lain.
- c) Amalkan rasa simpati dan empati iaitu berbuat baik kepada orang dan melayan orang seperti yang mereka mahu dilayani.
- d) Kerjasama secara kemasyarakatan iaitu dengan menjana dan bertindak berasaskan etika yang selari dan sama demi kebaikan dan manfaat semua.
- e) Bersatu di dalam kepelbagaian untuk cintai negara melalui pemupukan semangat taat setia dan rasa patriotik yang tinggi.

9. Prinsip-prinsip di atas hendaklah sentiasa diamalkan penuh sedar dan ikhlas berdasarkan pengalaman buruk yang dirakamkan sejarah ketamadunan manusia dan negara seperti yang disebutkan tadi. Bak kata pepatah mencegah adalah lebih baik daripada merawat. Usahlah membangkitkan perkara-perkara

yang boleh menyebabkan pertelagahan sesama kita, malah persefahaman yang telah terjalin selama ini perlu terus disuburkan terutama dalam kalangan generasi masa kini, agar kemakmuran, kestabilan dan kesejahteraan yang dinikmati akan dapat terus dirasakan pada masa akan datang.

10. Justeru, saya berharap agar melalui Forum ini, semua pemimpin dan wakil-wakil agama di negeri Perlis ini dapat bersama-sama memainkan peranan menyuburkan persefahaman serta menghindari perkara yang boleh membangkitkan ketegangan dan permusuhan antara kaum dan agama.

11. Sama ada kita Islam, Hindu, Buddha, Kristian dan sebagainya, kita dapat terima ini sebagai kepelbagaian dan Malaysia menjadi maju kerana kita berjaya wujudkan suasana yang sebegini.

Penutup

12. Akhir kata marilah kita cari titik persafahaman yang memangkinkan keharmonian dan hindarkan titiktitik percanggahan yang menimbulkan ketegangan, prasangka dan permusuhan. Mari kita laksanakan Muhibah tanpa terpaksa menggadaikan atau menghakis sedikitpun kepercayaan dan agama yang kita anuti selama ini. Saya juga sentiasa mendoakan Sambutan Minggu Keharmonian Antara Agama Sedunia di mana-mana sahaja di Malaysia akan membuahakan kejayaan yang diharapkan.

13. Maka, dengan lafaz Bismillahirrahmanirrahim, saya dengan ini Melancarkan Minggu Keharmonian Antara Penganut Agama Sedunia 2013 Peringkat Universiti Malaysia Perlis.

Sekian, Wassalamualaikum Warahmatullahi Wabarakatuh